

DOMENIE VIII «VIE PAL AN»

Antifone di jentrade Cf. Sal 17,19-20

Mi à tignût sù il Signôr,
mi à liberât e puartât te largjure,
parcè che mi vûl ben, mi à salvât.

Colete

Diu onipotent, danus par plasê la gracie
che il cors dal mont al ledi indenant seont il to progjet di pàs,
e la tô Glesie e puedi servîti contente e cence pôris.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Os 2,16.17.21-22

Tu sarâs mê par simpri.
Dal libri dal profete Osee
Cussi al dîs il Signôr:
«Ve, le tirarai dongje di me,
o tornarai a menâle tal desert
e i fevelarai al so cûr.
Li mi rispuindarà
come tai dîs de sô zoventût,
come la di ch'e je vignude sù de tiere dal Egjit.
Tu sarâs mê par simpri;
tu sarâs mê te justizie e tal dirit,
tal bonvolê e tal afiet;
tu sarâs mê te fedeltât
e tu cognossarâs il Signôr».
Peraule di Diu.

SALM RESPONSORIÂL dal Salm 102

R. Il Signôr al è bon e grant intal amôr.

Benedis, anime mê, il Signôr,
dut ce ch'al è in me il so non sant al benedissi.
Benedis, anime mê, il Signôr,
e no sta lassâ in dismentie nissun dai siei plasês. **R.**

Lui ti à perdonadis dutis lis tôs colpîs,
ti à vuarît di ducj i tiei mâi;
al à tirade fûr de buse la tô vite,
ti à incoronât di boncûr e di gracie. **R.**

Bon e di boncûr al è il Signôr,
pegri tal inrabiâsi e grant tal perdonâ lis colpîs.
No nus à tratâts daûr dai nestris pecjâts;
no nus à paiâts daûr des nestris colpîs. **R.**

Come ch'al è alt il cîl a preference de tiere,
cussi al è grant il so boncûr sun chei che lu rispîetin.
Come che un pari al à dûl dai siei fis,
cussi il Signôr al à dûl di chei che lu rispîetin. **R.**

SECONDE LETURE 2 Cor 3,1-6

Vualtris o sês une letare di Crist componude di nô.

De seconde letare di san Pauli apuestul ai Corints

Fradis, scomencino un'altre volte a racomadâsi dibessôî? O vino salacor dibisugne, come altris di lôr, di letaris di raccomandazion par vualtris o di vualtris? La nestre letare o sês vualtris, letare scrite tai nestris cûrs, cognossude e lete di ducj i oms. Si sa che vualtris o sês une letare di Crist componude di nô, scrite no cul ingjustri ma cul spirt dal Diu vîf, no su lastris di piere ma su lastris ch'a son cûrs di cjar.

E je cheste la fiducie che nô o vin in Crist, denant di Diu. No ch'o vedin il fiât di crodi in alc come ch'al vignis fûr di nô, ma la nestre virtût e ven di Diu, che nus à fats servidôrs de gnove aleance, no de letare ma dal Spirt; la letare e cope, il Spirt al fâs vivi.

Peraule di Diu.

CJANT AL VANZELI cf. Jc 1,18

R. Aleluia, aleluia.

Te bondance dal so amôr

il Pari nus à fats nassi midiant de peraule de veretât,
par ch'o fossin la flôr des sôs creaturis.

R. Aleluia.

VANZELI Mc 2,18-22

Il nuviç al è cun lôr.

Dal vanzeli seont Marc

In chê volte, i dissepui di Zuan e i fariseos a jerin daûr a zunâ. Alore a rivin un pôcs e i disin: «Parcè i dissepui di Zuan e i dissepui dai fariseos zunino, cu la cuâl che i tiei dissepui no zunin gran?». Gjesù ur rispuindè: «Puedino i invidâts a gnocis zunâ biel che il nuviç al è ancjemò cun lôr? Fintremai ch'a an il nuviç, no puedin zunâ. Al vignarà ben il timp che il nuviç ur sarà quartât vie, e alore, in chê dì, a zunaran. Nissun nol cûs un blec di tele grese suntun vistît vieri; senò la tele gnove, ch'e je stade zontade, e sbreghe chê viere e il sbrec al devente plui grant. Cussì nissun nol met vin gnûf in bufulis vieris, ma vin gnûf in bufulis gnovis; senò il vin al fâs spreçâ lis bufulis e tal ultin si piert vin e bufulis».

Peraule dal Signôr.

Su lis ufiertis

Diu, che tu nus dâs ce che nô o ufrin al to non
e tu metis l'ufierte in cont dal nestri servizi e suditançe,
o suplichìn il to boncûr
ch'al deventi par nô un premi
ce che par tô bontât al ven segnât a nestri merit.
Par Crist nestri Signôr.

Antifone a la comunion cf. Sal 12,6

I cjantarai al Signôr che mi à judât,
o vuei laudâ il non dal Signôr, l'Altissim.

O ben: Mt 28,20

Ve che jo o soi cun vualtris ducj i dîs,
fint a la fin dal mont, al dîs il Signôr.

Daspò de comunion

Daspò di vênus sostentâts cul to regâl ch'al salve,
o prein, Signôr, il to boncûr:
par che, cun chest sacrament che tu nus nudrissis tal timp,

tu nus fasis vê part de vite eterne.
Par Crist nestri Signôr.